

Morning Dogri (NSD) National News Bulletin 25-10-2024

आकाशवाणी

- भारत ते जर्मनी 7में अंतर सरकारी परामर्ष दी सह-अध्यक्षता करगंन। जर्मनी दे चांसलर ओलाफ शोलज होर त्रऊं दिनें दे दौरे पर भारत पुज्जी गेदे न।
- चक्रवाती तूफान दाना उत्तरी ओडिशा ते पच्छिम बंगाल दे समुंद्री कंडे बक्खी बधी गोआ ऐ।
- वित्त मंत्री निर्मला सीतारमण होरें विश्व बैंक गी आंकड़े दे विश्लेषण मे ज्ञान पर आधारित कौशल खेत्तरें दी पंछान च बक्ख-बक्ख देसें गी सैहयोग देने दी गुजारश कीती ऐ।
- मध्यप्रदेश च उपचुनाएं लेई नामजदगियां दाखल करने दा अज्ज खीरी ध्याड़ा ऐ।
- शतरंज च भारती ग्रैंड मास्टर अर्जुन एरिशैसी नै कल सर्बिया च चलै करदे यूरोपी शतरंज क्लब कप च जित्त दे कन्नै 2800 एलो-रेटिंग दा आंकड़ा पार करी लैता।

<><><><><><>

PM

प्रधानमंत्री नरेन्द्र मोदी ते जर्मन चांसलर ओलाफ शोलज अज्ज नमीं दिल्ली च अंतर सरकारी परामर्ष आईजीसी दी सह-अध्यक्षता करगंन। चांसलर शोलज भारत दी त्रऊं रोजा दी यात्रा पर कल रातीं नमीं दिल्ली पुज्जे। आईजीसी इक पूरा पराता सरकारी ढांचा ऐ जेह्दे तैह्त्त दवै पक्खें दे मंत्री अपने अपने जिम्मेदारी आले क्षेत्रें च चर्चा करदे न ते अपने बचार बमर्श दे नतीजें दी रिपोर्ट प्रधानमंत्री ते शोलज गी दिंदे न। दवै नेता अज्ज दपक्खी गल्लबाज बी करगंन जेह्दे च सुरक्षा, रक्षा बधाने, आर्थिक सैहयोग, हरित, सतत विकास सांझेदारी ते उभरदी ते रणनीतिक प्रौद्योगिकी दे क्षेत्र च सैहयोग उप्पर चर्चा कीती जाग। दवै लीडर जर्मन बपार दे 18में एशिया प्रशांत सम्मेलन गी बी संबोधत करगंन।

<><><><><><>

President

राष्ट्रपति द्रौपदी मुर्मू होर अज्ज दऊं दिनें दे दौरे उप्पर छत्तीसगढ़ जांगन। राष्ट्रपति होर अज्ज रायपुर च एम्स दे दुए दीक्षांत समारोह च शामिल होंगन। ओह रायपुर च एनआईटी दे 14में दीक्षांत समारोह च बी शिरकत करगन ते पुरखायोती-मुक्तनगन दा बी दौरा लांगन। कल राष्ट्रपति होर बिलाई च ग्रां दे चौथे दीक्षांत समारोह च शामिल होंगन। राष्ट्रपति रायपुर दे छत्तीसगढ़ च पंडित दीन दयाल मैमोरियल हैल्थ साईंस ते आयूष यूनिवर्सिटी दे त्रीए दीक्षांत समारोह च बी शामिल होंगन।

<><><><><><><>

IMD

भारती मौसम विभाग नै आखेआ ऐ जे चक्रवाती तूफान दाना हुन उत्तरी ओडिशा ते पच्छिम बंगाल दे समुंद्री कंडे बक्खी बधी गोआ ऐ। एह चक्रवाती तूफान जंदी अददी रातीं मितशकषिका राष्ट्री उद्यान ते धामरा बंदरगाह बश्कार ओडिशा दे समुंद्री कंडे कन्नै टकराया। भुवनेश्वर आले मौसम दफ्तरै मूजब इस दरान ब्हाएं दी रफ्तार 120 किलोमीटर फही घैंटे तगर पुज्जी गई। एह्दे असर करी केन्द्रपाड़ा ते मद्रक जिलें च तेज बरखा होई। मयूरमज, कटक, जाजपुर, बालेश्वर ते जगतसिंह पुर जिलें ते इंदे नै लगदे इलाकें च बी तेज बरखा बरे करदी ऐ। प्रशासन गी सौहगा करी दित्ता गोआ ऐ ते संवेदनशील इलाकें च सुरक्षा सरबन्धी हीलें कीते जा'रदे न। ओडिशा दे मुख्यमंत्री मोहन मांझी होर बी हालात पर लगातार तक्क रखा करदे न।

<><><><><><><>

FM-World Bank

वित्त मंत्री निर्मला सीतारमण होरें विश्व बैंक गी आंकड़े दे विश्लेषण ते ज्ञान पर आधारित कौशल आले खेत्तरें दी पंछान च बक्ख-बक्ख देसैं गी सैहयोग देने दी गुजारश कीती ऐ। एह्दा मकसद रोजगार दे मौके पैदा करना ते कौशल दक्षता दे मूजब नमें मौके उपलब्ध करोआना बी ऐ। वाकशंग्टन च विश्व बैंक ते अंतर्राष्ट्री मुद्रर कोष दिएं सलाना बैठकें थमां बक्ख-बाहरें लाई गेदी बैठकें च श्रीमती सीतारमण होरें आखेआ जे रोजगार पैदा करना आलमी सतह दे सब्बनें शा प्रमुख मुद्दें च शामिल ऐ। उनें रोजगार लेई विशेष कोशल गी तरजीह देने आले आर्थिक ते तकनीकी बदलावें दा जिक्र कीता।

वित्त मंत्री होरें आखेआ जे विश्व बैंक नै बक्ख-बक्ख खेत्तरें दे रुझाने ते रोजगार पर इंदे संभावित असर दे बारे च केई शोध कीते न। उनें गलाया जे इस बेल्ले होर मते व्यापक विश्लेषण दी लोड़ ऐ। जिंदे नै पता लाया जाई सके जे उभरदे रुझानें दा रोजगार पर कनेया असर पचै करदा ऐ। वित्त मंत्री होरें आखेआ जे माल तैआर करने आले रिवायती खेत्तर पर आधारित विकास दे अलावा वैकल्पिक जरियै दी तपाश करने दी बी लोड़ ऐ। उनें योजना दी असरदार ढंगै सिर अमलावरी लेई नतीजाकुन-कार्यप्रणाली पर जोर दित्ता।

<><><><><><>

MP

मध्यप्रदेश दी दऊं चुनावी क्षेत्रें च औने आले उप-चुनाएं लेई नामांकन पत्र भरने दी अज्ज खीरी ध्याड़ ऐ। मुख् चुनां अधिकारी सुखवीर सिंह होरें जानकारी दित्ती ऐ जे नामांकन भरने दे 6में ध्याड़े 7 नामांकन भरे गे ते 4 मेदवारें सेयोर जिले दे विजयपुर चुनावी हल्के लेई अपनियां नामजदगियां दाखल कराइयां। इआं गै कल 5 मेदवारें सेयोर जिले दे बुदनी चुनावी क्षेत्र लेई 7 परचे भरे। अजें मगर कुल मलाइयै 18 मेदवारें जिंदे च बीजेपी ते कांग्रेस दे मेदवार बी शामिल न। अपनियां नामजदगियां दाखल कराइयां न। दवै चुनावी हल्के च औंदी 13 नवम्बर गी वोट पाए जांगन।

<><><><><><>

Maharashtra Election

महाराष्ट्र च असेंबली चुनावें लेई हुनै तगर 558 मेदवार नामांकन भरे न। कांग्रेस पार्टी नै कल 42 मेदवारें दे नाएं आली पैहली सूचि जारी कीती। पार्टी दे वरिष्ठ नेता पृथ्वीराज चौहान होर कराड़ साउथ असेंबली सीट परा जिसलै के विजय बालासाहेब थोराट होर संगमनेर सीट थमां चुना लड़गंन। इंदे इलावा विपक्ष दे नेता विजय वेददेतीवर होर ब्रमपुर सीट थमां जिसलै के महाराष्ट्र कांग्रेस दे प्रधान नाना पटोले, साकोली सीट थमां चुनां मैदान च न। इस्सै चाल्ली राष्ट्रवादी कांग्रेस पार्टी शरद पवार गुट नै बी 45 मेदवारें दे नाएं दी सूचि जारी कीती ऐ। महाराष्ट्र नवनिर्माण सेना नै कल मेदवारें दी त्रीह सूचि जारी कीती।

<><><><><><>

CJI

न्यायमूर्ति संजीव खन्ना होर भारत दे अगले प्रधान न्यायधीश होंगन। विधि मंत्री अर्जुन राम मेघवाल होरें सोशल मीडिया दी इक पोस्ट च आखेआ जे राष्ट्रपति द्रौपदी मुर्मू होरें प्रधान न्यायधीश डी.वाई.चन्द्रचूड़ हुंदे कन्नै सलाह मशवरे परेंत न्यायमूर्ति खन्ना होरें गी 11 नवम्बर थमां भारत दा प्रधान न्यायमूर्ति नियुक्त कीता ऐ। ओह देसे दे 51में प्रधानउ न्यायधीश होंगन ते अगले ब'रे 13 नवम्बर गी सेवानिवृत होई जांगन। न्यायमूर्ति संजीव खन्ना होरें 18 जनवरी 2019 गी सर्वोच्च अदालत दे न्यायधीश दा औहदा सांभेआ हा। इस दरान उनें सर्वोच्च अदालत दे बक्ख-बक्ख संविधान पीठ च कम्म कीता ते नमें महत्वपूर्ण फैसले कीते। उंदे फैसले दे व्यक्तिगत आजादी दी प्राथमिकता ते मजबूत लोकतांत्रिक भागीदारी गी प्रमुखता मिली। न्यायमूर्ति चन्द्रचूड़ होर 9 नवम्बर 2022 गी भारत दे प्रधान न्यायधीश दा औहदा सांभेआ हा ते ओह औंदी 10 नवम्बर गी सेवानिवृत होआ करदे न।

<><><><><><>

Farooq

बारामुला जिले च कल संजा होए दे आतंकी हमले च 2 जुआन शहीद होई गे। इस हमले च 2 पिट्ठुएं दी बी मौत होई गई ते त्रै दुए जने घायल होए न। इनें त्रौनें घायलें दा इलाज अस्पताल च चला'रदा ऐ। सेना दी चिनार कोर नै सोशल मीडिया पोस्ट च दस्सेआ जे बारामुला इलाके च आतंकवादिएं ते सुरक्षाबलें बश्कार गोलीबारी होई। आतंकवादिएं पैहले सेना दी गड्डी उप्पर हमला कीता। उपराज्यपाल मनोज सिन्हा होरें सेना, जम्मू कश्मीर पुलस ते सिविल प्रशासन दे उच्च अधिकारिएं दे कन्नै गल्ल कीती। उनें आतंकवादिएं दे सफाए लेई बनकदी ते लोड़चदी कारवाई करने दा आदेश दित्ता ऐ। उनें बारामुला दे डिप्टी कमीशनर होरें गी हमले च मारे गेदे सेना दे पिट्ठुएं दे परोआरें गी हर संभव मदद पताने लेई गलाया। उपराज्यपाल होरें पीड़ित परोआरें कन्नै अपनी हमदर्दी जाहर कीती।

<><><><><><>

Chess

भारतीय ग्रैंड मास्टर अर्जुन एरिगैसी होरें कल सर्बिया च चला'रदे यूरोपी शतरंज क्लब कप च शानदार जित्त कन्नै 2800 एलो रेटिंग दा आंकड़ा पार करी लेआ ऐ। 21 ब'रें दे एरिगैसी विश्वनाथ आनंद हुंदे मगरा एह उपलब्धि हासल करने आले दुए भारतीय बनी गे न।

उनें प्रतियोगिता दे 5में राउंड च चिट्ठे मोहरें कन्नै रूसी ग्रैंड मास्टर दिमित्री आंद्रेइकन गी हराइयै एह् उपलब्धि हासल कीती ऐ। इस जित्ते दे कन्नै ओह् विश्व दी नंबर 3 रैंकिंग उप्पर पुज्जी गे न। एलो-रेटिंग इक प्रणाली ऐ जेह्दा इस्तेमाल कुसा खडारी दी खमता गी दुए खडारी थमां तुलना करने लेई कीता जंदा ऐ।

<><><><><><><>